

## Die AGF bräsendiert:



## Flomerschumm iss dufte !!!

Isch muss zugewwe, meer Flomerschummer liggen e Bissel abseits vumm Schuss - dess Fiehling unn dess Fläär vunn de Frankedahler Inneschdadt hämmer wahrlich nit zu biete. Awwer dodevor hämmer annere Vordääle, wie se bloß enn Vorort biete kann - sozusage "Vor-ort-dääle".

Enn gläane Hauch vunn Landlääwe hott sich noch aus de "guude alte Zeit" erhalte könne, wann ah die Baure nimmie gemächlich mit de Ochsekarre unn Gaulsfuhrwerke durch die Schdroße raddern, sondern sich mit ehre mäschtsche Trecker de Weg durch parkende Audoos unn jede Menge Verkehr bahne missen. Nä - isch mähn die relativ Ruh unn die Iwwerschaubarkeit in unserm Ort - dess sinn noch Privilegie aus friehere Zeite.

Schbaziergäng durch die umliegende Felder unn zum Baggersee sinn erholsam unn lehrreich gleichzeidisch. Flora unn Fauna sinn zum Greife noh unn wer nit grad in ähner vunn denne zwää Hauttschdroße wohnt, der muss hier wohl odder iwwel uhne viel Krach unn Verkehrsgeräusche auskumme. Dess iss wohl ah de Grund, warum sich so viel junge Familie in denne Neibaugebiede asiedeln - nooch dem Motto: "stressig arbeiten und relaxt wohnen".

Wer will, der findt ah schnell Aschluss in ähm vunn denne viele Veroine odder in de örtlich Arweitsgemeinschaft unn kann hier sogar mithelfe, unser Ortsgschehe zu gschdalde.

Die lauschige Blätzelscher in de Pergola am Zwiwwelbrunne unn am Wabbedoor, de Rentnerdreff im Pavillon am Falterblatz, dess Schdudium vunn dere alde Holzscheib mit de historische Ortsdate, der wild-

romandische unn immer noch namenlose Weg an de Isenach mit  
Besischdichung unserer einheimische Ende- unn Blesshuhnfamilie -  
denn sinn alles erlebenswerte Events im Flomerschumm vunn heit, die  
druff waaden, entdeckt zu werre.

Welcher annere Vorort kann dann sunscht noch enn Bahnhof uffweise?  
Zwar sinn die Zeide vorbei, in denne an de Bahnlinie zu de alljährliche  
Zuggerriewezeit "high life" geherrscht hott unn wann ah dess  
Verkehrsmittel frieher enn greeßere Schdellewert ghatt hott, so iss doch  
enn Bahnanschluss immer noch e ganz foinie Sach. Die Zieg fahren  
regelmäßig in korze Abschdänd unn sinn meischdens pinktlich. Sie  
bringen uns direkt dorthie, wu de Bär schdeppt - in die Frankedahler  
City. Manche wagen sich sogar von dort aus noch weiter in die Fern - die  
eiserne Schiene sinn sozusage unser altbewährdie "Onlineverbindung"  
in die groß, weit Welt. Dess wissen nit bloß die Schuulkinner unn die  
Pendler zu schätze, sondern ah die viele Worschtmarktler, die alle Johr  
im September vunn de Bahn - in oft fahr-untüschischem Zuschdand -  
direkt unn gefahrlos häämgebracht werren.

Ferr die meischde Nödischkeide unn Unnödischkeide, die merr im  
täglische Lääwe halt so braucht, iss in unserm Ort beschdens gsort,  
wass merr allgemoin als intaktie Infrashdruktur bezeichne känn.  
Schuul unn Kinnergaade, Kärche, Subbermarkt unn Drogerie-  
Discounter, Handwerksbedriebe, Bäggerie, Wertschafte, Schreibware,



Lotto, Keramikatelier, Banke,  
Apothek, 2 Dokder unnen Zahnarzt,  
Fußpflege, Kosmetik, Masaasche,  
Altenpflege, Ortsverwaltung, Poscht-  
unn Hermesfiliale sind innerhalb vunn  
1000 Schritt zu erreische. Leider  
werren awwer die meischde Ziele  
middyem Audo bewäldischt, was de  
innerörtliche Verkehr immer schäh  
uff Trab halt.

Es fehlt uns also fascht garnix in Flomerschumm. Sogar mit de fehlende  
Parkplätz und mit de Menge vunn rasende Audofahrer kenne merr locker  
mit de Innestadt konkurriere.

Wammer mool enn Facharzt uffsuche muss, ins Kino gehe odder sich  
ins Marktdreiwe schderze will, do geht merr halt in die Schdadt - unn  
zwar in unser Schdadt - nooch Frankedahle - denn iss Ehresach!  
Schließlich gheere merr seit 1919 mit Haut unn Hoor dezu ----- unn  
doch, denn Kilomeeder Abschdand meschte merr in de Tat nit misse !!!

Mit Bus, Bahn oder Auto sinn's bloß e paar Minudde bis in Herz vunn de Metropolregionsschdadt Frankedahl. Es soll sogar Leit gewwe, die die ganz Schdreck mid dem Fahrrad oder per Fuß bewäldischen. Unn dodebei zeigt sich dann widder dess Schdiggel Landlääwe, vunn demm isch am Anfang geschriwwe hab: Uffem Weg vunn dere belebte City hämwärts, entlang dere herrliche Platane-Allee, do kammer unser Flomerschumm schunn vunn Weidem mit zuune Aage erschnubbre, ganz besonders in de Erntezeit. Blihende Grumbeeräcker verschdrömen enn herrlich sieße Geruch, der alle Frankedahler Duftwasser-Filialischde zur Ehr gereiche kännt - druggene schdaawische Kornfelder im hääße Summerwind duften nooch Kindheit unn Drachefliege unn wann dann erscht mool die rägenasse Kohlgrutze unnergezaggert sinn unn die vollreife Zwiwwle geernt werren - moin liewer Scholli, dess nenn isch Heimatgerüche - isch sag's jo - unser Flomerschumm iss dufte.



Während isch dess jetzt grad schreib, isses Juni - ringsum grient unn bliht die Naduur, enn Haufe Veggel schwirren durch die Gegend unn gewwen ehr koschdenlose Konzerte, die Luft iss lau unn agenehm unn isch froog misch, wie dess bloß kummt, dass in de größere Schdädt iwverhaupt noch Mensche lääwen wollen.

PS - Ogdower 2007:

Weil jo die Regierende vunn Frankedahl unn Flomerschumm immer bemieht sinn, die Lääwensqualidääd ferr uns zu verbessre, werdd im

Moment grad in die Schdrooß Rischdung Lambsem e Verschwendung odder Verschlenkung odder wie dess hääßt, oigebaut.

Jetzt werdd's ball ruischer in de Fräänsemer Schdrooß, weil die Audofahrer ganz sischer enn Mords Reschbekt vor dem Bonsaikürvche hänn unn dann gaaanz langsam nooch Flomerschumm noirollen.

Bloß gäge diejenische, die nauszus brummen, misse merr jetzt ah noch e Brems finne - wie weer's dann mit're Dauerbauschdell vunn de Schdadtwerke ???

Walter Rupp




## Kinner unn kä Änd!

Als Kind hab isch jo aa schunn immer gärn unn viel gebabbeld. Bevor isch in die Schuul kumme bin hott moin Babba meer erglärt:

Inn de Schuul derf merr net so rausbabbeld, do muss merr de Finger schdregge unn sisch melde bis des Frollein ähm uffruft. In de erschde Zeit hott des ganz gut geglabbt. Noch're Weil iss merr dess Waade zu bleed worre. Immer efter hab isch dann rausgeblärrt obwohl isch garnet dro war. Unserm Frollein iss dann mool de Grage geblatzt. Sie hot misch dann ermahnd: „Helga, wie oft soll isch derr noch sage, dass du net immer so viel dezwische redde solscht“. Isch hab dann äfach gfrogt: „Warum? Du redsch doch aa!“ Dess war awwer net so gut, isch hab dann Zeit griggt, die Egg vunn unserm Schulsaal genau zu betrachde. Die Ermahnunge vunn domols hänn awwer bis uff de heidische Daag nit gewirkd.

Helga Wirth



# Die Kerweredd 2007

## vumm Kerweborsch Rainer Hannemann

Wieder mal ist es soweit, wieder mal ist Kerwezeit, wieder mal, ich seh's mit Wonne, wieder mal seit ihr gekomme, wieder mal ein volles Zelt, vom Tennisclub hier aufgestellt, wieder mal Gäste aus fern und nah, zur Flomersheimer Kerwe da.

Drum grüß' ich alle Flomersheimer, Hammerdorf Eppstääner und Studernheimer. Ich grüß Abgesandte von de Stadt, sofern man samstags

welche hat, ich grüß Ortsvorsteher, Ortsbeiräte grüß Onkel Jakob, Tante Käthe, grüß Vorsitzende vunn de Vereine, grüß große Leute und aach kleine, grüß wichtige- und die sich dafür halten, grüß junge Leute und die Alten, grüß' Leute von der KSB, BASF'ler hab ich aach gesehich grüß Kirchgänger und nicht so fromme, von dene sinn aach paar heut gekomme, grüß Fußballer und Gymnastikfraue, grüß die Intelligennten und die Schlaue, grüß Miss Strohhut welche Wonne, wo sie auftaucht, scheint die Sonne, ich grüße hier auch, wie alle Jahr, unser jüngstes Ehepaar, es soll der liebe Gott euch beiden im Leben, viel Liebe und auch viele Kinder geben. E halbe Stund könnt ich jetzt noch grüße, doch des würde mir und euch die Stimmung vermiese, drum höre ich jetzt mit der Begrüßung uff, weil ich jetzt mit euch mol trinke muss. PROST!!!

Doch halt do fällt mir etwas ein, eine Begrüßung muss noch sein.

Drum grüß ich besonders den OB unserer Stadt, der bei der OB-Wahl in diesem Jahr bewiesen hat, dass - wenn man wie er so nah beim Volke steht, und das ganze Tun sich um den Bürger dreht, dann hat man, wie in seinem Fall, kein Problem bei der Wiederwahl.

Pfälzisch loyal regiert er im Amt, ist selbst von politischen Gegnern anerkannt, er regiert demokratisch korrekt mit alle Finesse, bis die annere WORSCHT sagen, hott er se schunn gesse. In der Presse konnte man es dann lese, sein hoher Wahlsieg wäre einmalig gewese. Und nach dieser Wahl hat sich mancher gedacht, endlich mal das Kreuz an de richtigen Stelle gemacht. Und zu seinem Erfolg, des kann ich hier sage, haben die Flomerschummer auch beigetrage. Selbst die Auszählung hätt man bei uns mache gekennt, wenn man sich do mol verzählt hätt, hätt kääner geschennt. Drum mach ich's wie die Pfarrer, ich sprech' hier für fast alle, dass er wieder OB ist, des dut uns gefalle.



Es gibt viel zu tun, Herr Wieder, in de nächschte paar Jahr, drum viel Spaß bei de Arbeit und bleiben se weiter so chlor! Unn was jetzt kummt, ich sags grade heraus, das ist ganz alleine ihr Applaus.

Die Welle der Begeisterung ging in der Grundschul' bei uns um. Von 46 Schulen in der Pfalz, war man die beste jedenfalls, genauso wie vor einem Jahr, ging man als Sieger wieder hervor. 183 Sportabzeichen wurden hier errunge, das hat wie Musik in meine Ohre geklunge. Bei der Feier dann im Mai, war de Dietmar Borth dabei. Spendierte für die kleinen Sieger, Mohrenköpfe immer wieder.

Vom OB gab es, nachdem der Rektor genickt, zwei Tage hausaufgabenfrei, das war von ihm sehr geschickt. Uff die Idee vum OB muss ich nochher mol trinke PROSCHT - die Kinner warn begeistert unn es hot nix gekoscht.

Doch Siege auf Landesebene reichen der Grundschule nicht aus, man streckte die Fühler nach höherem aus. Und jetzt kommt wirklich ein Hammer, ich war ja ganz platt, man hat bei einem Wettbewerb der Stiftung Lesen de 1. Platz gemacht. Klassenlehrerin Zenker, dass kann ich eich saa, hat dafür 2 Monate gebastelt - mit de Klasse 4a. Und das Thema der Geschichte, dass sag ich euch auch gleich, man war auf Abenteuerjagd in Neptuns Reich! Und das mit Erfolg, wie ein jeder jetzt weiß, die Belohnung dafür war der erste Preis.

So ein Erfolg kommt nicht von allein, es muss viel Engagement von de Lehrkräfte sein.

Drum sag ich von hier oben, ich denk auch in euerm Sinn, ein herzliches Danke an das Lehrerkollegium der Grundschule hin. Und jeder hier im Zelt ja weiß, jede Leistung hat seinen Preis. Auch die AGF honoriert solche Sache, drum tu ich es hier wie schon einmal mache, ich denke auch diesmal ist es keine Verschwendung, vun de AGF gibt's für die Grundschul 150.- € - zur freien Verwendung.

Bombenstimmung, so könnte man sagen, in der Gemarkung Flomersheim vor wenigen Tagen. Das Herrchen von einem Hund war jo ganz platt, wusste nicht, dass er en Bombensuchhund hat. Der Hund hot jo beim Gassigehn, eine Flugabwehrgranate uffem Acker gesehn. 1000 Bomben findet man jährlich in unserem Land, 97% werden als harmlos erkannt, nur in Flomerschumm wär's gefährlich und schwer, es hätt' mich aach gewunnert, wenn's anerschtrum wär. Und jetzt lief dann ab das volle Programm, der Kampfmittelräumdienst musste ran. Und der entschied kurzfristig und schnell, das Ding wird gesprengt an Ort und Stell'. So hat man neben dem Objekt der Gefahr, ein Loch gegraben, wunderbar. Mit einer Sprengung, so hat man gedacht, wird die Granate unschädlich gemacht. Um 12.30 machte es dann bumm, es hott laut gekracht - unn alles

guckt dumm. Ausser der Granate, wie man jo gedenkt, hot merr aach noch e Wasserleitung gesprengt. Und wer beim vorbeifahrn uff den Acker schaut, hot gedacht, ei in Flomerschumm wird jo e Schwimmbad gebaut. Doch so war es nicht, wie sie alle ja wissen, die Sprengung war gut - de Rest war beschissen. Doch der Landwirt, dem der Acker gehört, reibt sich die Händ' - weil ihn des gar net stört. Der kann sich halt in de nächste paar Jahre, die Beregnung vunn dem Acker ab jetzt erspare.

Apropopo Hunde, do hab ich gehört, dass in de Immegärte das Gassigehn stört. Vor Jahre hab ich von hier oben schon gebeten, lasst sie Drücken im Feld und nicht in den Beeten und auch nicht am Straßenrand, wo die Kinder rumlaufen, und auch nicht in öffentlichen Anlagen, wo die Jugendlichen saufen, sondern dort im Feld wo die Bomben liegen, können sich die Hunde den Hintern verbiegen. Und als Hundebesitzer muss man ab sofort wisse, in Flomerschumm wird nur noch uffem Acker geschisse. Eventuell hätte Herrchen dann Glück und sein Hund findet auch ein Bombenstück - und findet dieser Hund dann derer drei, ist er ein Jahr Steuerfrei. Dann schlägt man zwei Fliegen mit einer Klapp, de Hund wär beschäftigt und die Bombe werrn knapp.

Deutschlands Kirchen geht's schlecht, jeder Gottesmann stöhnt, weil es hinten und vorne an Finanzen ja fehlt. So manches Gotteshaus hat morsche Balken, kein Geld in der Kasse um es zu erhalten. In so manchem Prachtbau, Jahrhunderte alt, muss der Gottesdienst ausfalle, die Heizung ist kalt. So manches Manko könnt ich dahingehend nenne, doch das würde den Umfang der Kerweredd sprengt. Uff was ich hinaus will, jetzt komm ich zum Thema, in Flomerschumm haben wir das gleiche Dilemma. Das katholische Gotteshaus, dieser Betonprachtbau, steht kurz vor dem finanziellen Super-Gau.

Gebaut wurde die Kirche Ende der 60- iger Jahren, da spielte Geld keine Rolle, das war gar keine Frage. Damals - wegen de Koschte hot schunn so mancher gemotzt, doch es wurde nicht gekleckert, es wurde geklotzt. Und jetzt, heute, im Jahre 2007, werden dicke rote Zahlen geschrieben. Jetzt muss man aktiv werrn, jetzt wird reagiert, es wurde auch Zeit das endlich was passiert. Ihr wisst jetzt alle was ich mein, man gründete kürzlich einen Förderverein. Und der wird geführt und das finde ich schön, von unserem vereinskampferprobt Udo Böhm. Und Gottes Hand reicht auch bis iwwer die Brick, drum machen in dem Verein aach die Eppstääner mit, vorneweg Ortsvorsteher Hebich, doch der ist des Pudels Kern, wenn der net dumm babbelt, könnt des werklich was werrn.

Damit in unserer Kirche der Schornstein weiter raucht, werden ca. 11 Tausend Euro gebraucht. Wenn vun 500 Leit jeder 22.- Euro spendiert, wären die Kirchenfinanzen vorerst saniert.

Mein lieber Udo, das ist schon ein Wort, ich wünsch euch bei der Aktion viel Erfolg im Ort. Und weil der Kerweborsch zu seiner Rede steht, hab ich hier en Umschlag, wie ihr alle seht. Ich spende hier 22.- Euro, ganz munter und frisch, wenn's 499 Leit nachmachen, iss des Thema vum Tisch. Ich geb's mit Freude und mit Ehrlichkeit im Sinn, obwohl ich evangelisch bin. So nun mach ich langsam Schluss, weil ich wieder einmal enden muss, mit meinen Reden und Zitaten und auch das Freibier tut schon warten.

HALT: Über Freibier hab ich noch was geschriwwe, es war vor acht Tag bei de Kerwe-Eröffnung - im Hammerdorf driwwe.

Die Rede waren geschwunge, das Volk war in Fahrt, und jeder im Zelt hott uffs Freibier gewart.

Uff dere Bühn sah es aus - genau wie hier owwe, hinterm Rednerpult stand en Tisch mit Biergläser drowwe. Dann kam der Hammer, der OB schaute gequält, es war alles do, nur es Fass Bier hot gefehlt. Kurz perplex, doch dann hot er gelacht, en Faßbier-Anstich ohne Fassbier hot er aach noch net gemacht. Im nächste Johr so verspricht er dort de Leit, bringt er es Fass Bier vun dehäm mit, jetzt wisst ihr Bescheid.

In Flomerschumm, Herr Wieder, da muss das nicht sein, geben sie die 50.- Euro lieber dem Förderverein. Damit das mit dem Bier hier und heute nicht passiert, hab ich das Faßbier vorher inspiziert, damit man nach den Reden dann, die Kerwe richtig eröffnen kann.

Ich wünsch Euch ne schöne Kerwezeit, volle Gläser alle Zeit. Feiert kräftig und macht mit, dann bleibt ihr auch noch lange fit und verliert nicht den Humor, dann wird es Nächstjohr widder glor.

Ich hoffe, dass ich euch dann alle wiederseh'

dass wünscht sich de Rainer vunn de AG. - **DANKSCHEE!!!**



## Kerwe-Esse

Freunde hänn zusamme ziemlich feischt-frehlich Kerwe gfeierd. Wies hald so iss, drinke, esse, drinke, esse. Vunn dere Durschnannermischung isses demm Ääne ganz schleschd worre. Zweemol hott deer im Hof vunn deere Wertschafd alles widder rausgelosst. Nochem dritde Mool fangd er o zu iwwerlegge: 's erschde Mool wars dess Rumschdeg, s'zwäddemol die Brodworschd, awwer er denn kläne Hund gesse hawwe soll, dess hodder nimmi gewisst.

Erglärung : Beim dritde Hofgang war dess Hündche vunn de Werdslaid mit naugschlubbt unn issem dann zwische de Fieß rumgeloffe. Der Hund hott kenn Schade genumme.

Helga Wirth




## De Geburtsdag vum Groß-Unkel !

De kleene Torben werd vun seiner Oma außem Nachbardorf mit dem Auto in Flomerschumm vun de Schul abg`holt. Glei am Bahnüwwegang hot er zu de Oma g`saat: "Halt a, ich muß noch in de Neikauf e Geburtstagsgschenk fer de Baldur kaafe".

De kleene Torben kummt ganz schdolz außem Markt mit zwee kleene oigepackte G`schenke. In Eppstä außem Auto raus , die Hose noch e bissel zurechtgeriggt geht mit ´me glückselische Lächle im G`sicht zum Geburdsdagskind.

De Torben e bissel uffgeregt un mit feischde Händ, graduliert er seim Groß-Unkel , gibt em ä Päckel un sagt: "Ääns langt fer disch des annere is fer die Ria". De Unkel bedankt sich. Voller Neigier macht er`s uff, un was mänt ehr was do verpackt war? En Eierbescher fer de Baldur un de anner fer die Ria. Do hot der liewe Torben die erscht halb Schdunn fer Unterhaltung unn Lache g`sorgt. Wie dann de Baldur de Klää g`froogt hot, wie bischt dann uff die Idee mit denne Eierbescher kumme, hott er zur Antwort gewwe: " S`iss mer halt nix besseres oi`gfalle".

C M



**Ja wu gibt´s dann sowass ?!?!?**

Wieviel vunn denne  
senkrechte Linie sinn schäbb  
???



Wer jertz mäht die weren  
allinanner schäbb, der hott  
sich gewaldisch gschmerrt. Die  
Linie sinn nämlich all grad,  
awwer unsern Herrnkaschde  
will´s nit glaawe - gell ?

# Heit werdd gegrillt !!!

Die allerschönste  
Beschäftigung im Sommer  
ist doch immer noch die  
Grillerei - besonders für die  
Männer.


Da kann sie auch so rüchisch  
zeigen, was ein echter Kerl ist  
und eine Frau und ein Gast  
mit der feinsten Leckerei  
verwöhnen.

Dass ist die Ärztin für Frauen,  
weil sie meistens im Freien  
schuttelt - sozusagen in  
freier Wildbahn - und  
zudem die Handwerker mit  
offenem Feuer ganz arg  
gefährlich ist. Grillerei ist halt eine  
rein männliche Sache !

Dass aber die Frau die  
Schlepphose trägt, weil sie an dem  
Abend garnix zu machen  
kann, dürfen sie sich, ihre  
begrenzte Fähigkeit entschuldigend, ein bisschen  
nützlich machen und ein  
paar Rüdchen-Sachen erledigen.

Dass läuft dann ungefähr so ab:

1. Die Frau fährt meistens zum EDEKA und kauft ein. Schokolade und  
Brotwürstchen, Gemüse und Salat, Bier und andere Getränke und alles, was  
man für ein Grillabend braucht.
2. Die Frau macht ein paar Sorten Salat - Gurkensalat, Bohnensalat,  
Weißkrautsalat und Gummisalat und zaubert noch ein wunderbares  
Schüsselchen voll Tiramisu für den Nachtisch - dass ist ja so einfach - da  
kann man eigentlich garnix falsch machen.
3. Die Frau wäscht die Schokolade, legt sie schön ausgerichtet auf ein Tablett  
und bringt sie zusammen mit allen möglichen Grill-Utensilien raus an den  
Grill, wo der Mann schon mit dem Gast plaudert und sein drittes  
Bier trinkt.
4. Der Mann schmeißt sein Fleisch auf den Grill !!!!!
5. Die Frau bringt die Decke, den Tisch und Gläser ins Freie.



6. Die Frau ruft ehm Mann zu, dasses Flääsch am Abrenne iss.
7. De Mann nickt wohlwissend, dreht die agekohlte Flääschbrogge nochemool rumm unn brummt, ´s weer eh glei ferrdisch unn auserdem bräucht er noch e Bier.
8. Die Fraa bringt dess Bier, macht die Tischdeko, baut Deller, Beschdeck, Servjedde, Salaade, Weißbrotscheiwe, Soße unn Dipps uffem Disch uff.
9. De Mann nimmt dess Flääsch vumm Grill unn iwwegibt´s gönnerhaft soiner Fraa.
10. Die Fraa serviert und gibt jedem Ebbes in de Deller.
11. Die Gäscht essen unn drinken, loben dem Mann soi Kochkünscht unn die perfekt Organisation, diskuddieren iwwer die Vor- unn Noochdäale vunn verschiedene Grillzange, Holzkohlesorte unn Grill-Azinder unn kummen zu demm Schluss, dass der Hausherr halt doch enn begnadete Gurmee unn enn brilljannde Grillmääscher iss.
12. Die Fraa raamt de Disch ab unn schbielt glei den Berg Gscherr weg.
13. De Mann sagt zu soiner Fraa: "Na, dess war doch mool toll ferr disch, dass du heit mool garnix koche gemisst hoscht!!!"
14. Die Fraa guggt´n schääl vunn de Seit ah.
15. De Mann denkt: "Denne Weiwer kammer awwera garnix recht mache"


Walter Rupp

(die Gschischt iss frei erfunne - Ähnlichkeite mit läawende odder doode Persone weeren roin zufällisch unn kummen in Flomerschumm so gut wie garnit vor)

Enn Flomerschummer kummt Owens schbeet in die Pizzeria in Ebbschdää unn beschdellt sich e große Pizza Speziale mit allem Drumm unn Dra. Wie se dann außem Owwe kummt froogt der freundliche Pizzerianer: "Soll ich schneiden Pizza in 4 oder in 6 Stücke?"  
**"Liewer bloß viere - sechse weeren merr jetzt doch e Bissel zu viel ferr uff die Nacht!"**  
 Walter Rupp



## Zum Dorschangle an die Ostsee...



Sundag de 10. September morjens 5 Uhr,  
endlich, 's is soweit. Drei lange Jahr hämmer  
druff gewaat. Alles is zum xte Mol bis ins  
Klänshde besproche: De Rainer

Hannemann stellt soi Wohnmobil zur Verfügung, de Reinhold Wirth wäas wu  
in de Ostsee die Dorsch stehen un is deshalb de Käptn, de Hans Wirth is  
Neimitglied in dere Runde un verzähld dauernd, was er uff Fehmarn schunn  
alles gfange hot.

*„Isses Bier un die Fudderasch verstaute?“* Die Angle, die Gummistiwwel un  
die Regesache liegen bereits in de groos Kischd hinne uffem Auto. *„Hämmer  
wirklich nix vergesse- egal , wann doch, mer hän jo Geld debei.“*

*„Alles oisteige!!“* Los geht's Richtung Dänemark uff die Insel Langeland -  
Ziel is Spodsberg, oder besser gsaat, die Dorsch im Langelandbelt.

Korz hinner Frankfort geht's schunn los: *„Simmer noch nit bald do?“*

*„Nää, awwer mer hän glei e Zehntel hinner uns.“* Die erschde Bedenke  
tauchen uff: *„Was mache mern, wann die sechs Kühlboxe fer die Fischfilets  
nit reichen...?“*

De Hannemann hot sich inzwische uff de hinnere Sitzgrupp zum schloofe  
hiegelegd, bis spät in die Nacht war er noch Musik mache un dodevunn muss  
er sich erschd erhole.

De Hans un de Reinhold wechseln sich beim Fahre ab. Zwischedurch werren  
immer mol widder Gschichde verzähld, wie viel Fisch mer bei de ledschde  
Toure gfange hot un was fer Klötz do debei waren. Naja, alles was Angler halt  
so zusammelügen wann se sich erinnern.

Die dänisch Grenz is kumme, später simmer bei Kolding uff die Insel Fünen  
gfahre, dann iwwer die Insel Tasinge uff die Insel Langeland, alles iwwer  
Brücke. Endlich um halwer sechse owends konnten mer im Hafen vunn  
Spodsberg de Motor abstelle un unser klänes 7m langes Kutterle wu mer  
gemiet hänn liewevoll in Empfang nemme. Jetzt war ach de Rainer widder  
hellwach.

*„Ach Gott, wie werren mer dann do morje frieh draus uffem Wasser in de  
Dorsch rumsteige, wann uffem Boot die Fischkischde iwwerlaafen?!“* Känn  
Gedanke mer an dehäm.

Ab jetzt werren Fischfilets fers ganze nächsde Jahr gfange. Soweit die  
Theorie.

In de Praxis hot des folgendermaßen aussehe:

Am erschde Dag blos drei halberrechte kläne Dorsch, die hämmer mol glei  
zum Owendesse nunnergedreht. Ach waren die so foi, so frisch schmecken se  
halt blos do howwe.

Na ja, mer werren unser Dutte noch voll grigge, schließlich simmer noch

sechs Dag do.

Mer kann sich schunn denke, wie 's weitergange is.

Genau, in de restliche Zeit hämmer grad mol fer jeden sechs Päckelcher Fischfilet einfriere könne, also so schlecht wars noch nie - dess warn deire Fisch. Awwer s'is halt e Hobby.

Uns sinn dausend Erklärungen oigfalle, warum widder faschd nix gfange worre is:

...äamol war zuviel Wind, dann war die Strömung zu stark, außerdem hänn die große Fischtrawler mit ehre lange Schleppnetze alles leergezooge, bei starkem Ostwind fangt mer sowieso schlecht ...usw. usw.


Also Spass beiseit, uns is schunn uffgfalle, dass des in de letschde Johre mit de Fisch in de Ostsee dramatisch abgenumme hot. Noch vor zehn Jahr mussten mer als manchmol bis in die Nacht Fisch putze, soviel hot mer do gfange. Es misd mol e paar Jahr e Fangverbot verhängt werre damit sich der Bestand widder erholt, ansonschde gibt's vielleicht bald garkänni mehr.

Uff die Stimmung hot sich übrigens der schlechte Fang iwwehaupt nit niedergschlagge, denn es waren zwar stürmische, awwer herrlich sunnische Altweisersummerdage unn wammer nochem Angle nit stunnelang noch Fisch butze muss, dann hot des a was fer sich.

Eigentlich wollten mer jetzt nimmi do nuff fahre...mol sehe.

Vielleicht browieren mers 's jo doch noch äamol 's nächste Jahr, des wissen unser Fraue awwer noch nit.

**Reinhold Wirth**



## Gebore in de Middel vum vorische Johrhunnert - unn trotzdem iwverlebt

Manche Leit werren sich noch gut erinnere an die Johre nochem Grieg, wu alles ferr uns Kinner noch e ganz glää bissel annerscht war wie heit:

**1.** Unser Fahrräder - soweit meer iwverhaupt welsche ghatt hänn - waren weder TÜV-gebrüft, noch hänn se de europäische Sicherheitsschdandards entschbroche.

**2.** Iwver Fahrradhelme hedde merr bloß gelacht

unn uns schänniert, wammer se hedden uffziehe misse.

**3.** Meer hänn kä Playstations, Nintendos, Videorecorder, Videospiele, Computer unn Chatrooms gekennt unn sinn trotzdem nit vor Langeweile umkumme.

**4.** Meer hänn uns schdaddesse mit de annre Kaffruuse hinnerm Schbortblatz gedroffe, unn dess ohne sich middem Handy vorher zu verabrede.

**5.** die Eltern hänn uns nit dauernd per Telefon kondrolliere kenne unn hänn nit gewisst, wu mehr uns de ganze Daag rumgedriwwe hänn. Die hänn bloß gschännt, wann's owends mool e bissel schbeeder worre iss.

**6.** Zum Drinke hämmer kä Punica-Oase ghatt, kä schderieles Mineralwasser aus Blastikflasche, bloß Wasser auserm Hahne odder auserm Gaadeschlauch mit unn ohne Brausepulver - unn jeder hott soi Schnuut draghängt, ohne glei an Bazille unn Vire zu denke.

**7.** Meer hänn uff de Schdrooß Fußball gschbielt, midde im Verkehr - ohne Schbielblätz mit allemeeiglische Verbotsschilder unn kindgerechte, pädagogisch wertvolle Schbielgeräte - unn kanner vunn uns iss doodgfahre worre.

**8.** Meer hänn uns Rollwäggelscher gebaut odder uns mit eiserne Rollschuh waghalsische Renne geliwwert. Wann merr sisch dann mool die



Knie odder die Ärm uffgschrammt hott, war merr halt selwer Schuld unn iss noch verschännt worre dezu - vunn wäge Elleboge- odder Knieschitzer.

9. In de Schul hott's guude unn wennischer guude Schüler gewwe.

Wemm's nit gelangt hott, der hott halt dess selwe Johr nochemool ausbrowiere dirfe. Dess war kä so Kadaschdrof wie heit unn känner hot glei zum Logopäde odder zum Kinnerpsycholge gehe misse.

10. Meer hänn in de Audos ghoggt uhne Airbag, Kannersitz, Sicherheitsgurte unn Koppschdütze.

11. Dess bissel Schbielzeig, dess merr ghatt hänn, war mit bleihaldische Farbe agemoolt unn unser Gidderbettscher waren mit giftische, umweltbedenkliche Lacke iwwerzooge.

12. In de Schdeckdose waren kä Kannersicherunge drin, die Flasche mid de Haushaltsroinischer unn Butzmiddel waren "kinnerleicht" uffzudrehe.

13. Meer hänn all selwer unser Erfahrungs mache misse, mit Erfolge unn Rückschlag unn sinn so uff's Lääwe vorbereitet worre --

**awwer 's is doch wirklich e Wunner, dass merr allminanner so e gfehrliche Kindheit iwwerläbt hänn.**

Walter Rupp

Neilisch hab isch ebbes Gebrauchtes bei Ebay erschdeigert. Am negschde Daag will ich 's abhole unn hab schunn mit dere Fraa telefoniert.

's weer ganz äfach zu finne - in Boinderschemm in de Großnitzemer Schdrooß Nr. 11 - e Backschdäähaus an de Bushaldestell - hab isch meer uffgschriwwe.

25 Minudde bin isch dann durch ganz Boinderschemm gekurvt. Hie unn häär - vor unn zurigg. In de Großnitzemer Schdrooß gibt's kä Nr. 11 - do sinn bloß e paar Haiser. Die beschriwwe Bushaldeschdell iss in de Hautschdrooß, awwer nit bei Nr. 11 unn schunn gar kä Backschdäähaus - vielleischt käänt die Fraa dodemit ah dess Backhaus vunn de Bäggeri gemähnt hawwe - iss awwer dann ah nix. In de Frankedahler Schdrooß finn isch endlich e Backschdäähaus mit de Nr. 11. Isch klingel - awwer die Leit duen verwunnert unn wissen vunn garnix.

Also nochemool in de Großnitzemer Schdrooß e paar Leit gfroogt.

Antwort: "Jo mei - dös kennt schoh do weider drausen soi". Naja, wuher sollen die zugroaste Bayern dess ah wisse.


Nooch 're Schdunn binn isch dann endlich widder entnervt in Flomerschumm ogedrudelt.

Do rabbelts Telefon - die Fraa froogt, wu isch dann bloß bleib - sie waad schunn seit 2 Uhr in Großnitzem in de Boinderschmer Schdrooß Nr. 11 uff misch - in dem Backschdäähaus bei de Bushaldeschdell.

Walter Rupp

## Seltsame Viescher

Nä, isch verzehl jetzert nit vun de Elwedritsche odder annere Pälzer Fawelwese. Bei mir geht's um Viescher, die im unn nooch dem 2. Weldkriesch, besonnens im Herbschd unn Winder in Baurekreise gsehe worre sinn.



In denne schlechde Zeide iss dess Schlachde vum Vieh schdrenge kondrolliert unn kondingendiert gewesst. Dess Schlachde vunn Großviescher wie Rinder, Küh unn Sei iss genau nooch Zahl unn Gewischt feschdghalde worre. De Viehdogder iss domols aus Frankedaal kumme unn hott alles agugge unn prodokolliere misse. Schoofe unn Gääse sinn norre mid isch glaab- ääm halwe Gewischt gereschent worre, unn Hinkle unn Stallhase waren ganz frei.

Moin Vadder als Menschedogder unn sein Kollesch, de Viehdogder waren iwwer viele Johr gude Kumbels. Änes Dags hodder moim Vadder vunn ääm seltsame Schlachtvieh verzehlt. Bei ääm Flomerschummer Bauer isch kennt eich noch de Name saage hott de Veterinär uagemeld soi Visitt gemacht. „Weschd, Wilhelm, hott er gsacht, „isch habb in moim Beruf schunn viel gsehe, awwer e Sau mid zwä linke Seide iss mer noch nit unner die Aache kumme“.

## Domols: Alla dann, enn Guude!

Wemm gedenkt's noch, domols woo noch wennisch Audos uff de Schdroose waren unn faschd alle Leit mid dem Fahrrad uff die Ärwed gfare sinn?

Isch hab domols als Bu mid meinre Eldre im Gemäähaus direkt am Kriescherdenkmol gewohnd unn moi Zimmerfenschder iss vorne naus uff die Frangedaler Schdross gange.

Es muss so End vunn de 40er Johr gewesst soi. Hunnerde vunn Fahrradpendler aus Flomerschumm, Lambsem unn Eppschtä sinn mit emm Fahrrad in de Friehe um fümfe unn owends um zehne in die Schischt gfare odder redur kumme. Sie henn meischdens bei's Kleine, s`Kiehles, s`Alberts odder in de Schdobber geschaffd.

Grad vor moim Fenschder, also kurz vor de Schdroßegawwel noch Ebschdä unn Lambsem, henn se sisch lautschdark verabschied: "Alla dann, enn Guude!"

Unn dann werd aa noch gegeseidisch geklingeld. Hunnerde mol mojens unn owens des Gleische: "Alla dann enn Guude". Alleritt iss enn annere Pulk kumme. Isch habb kä Uhr unn känn Wecker gebraucht, unn immer nooch 10 bis 20 Minudde war der Zauber vorbei. Mansche Radler hab isch ann de Schdimm unn am bimm-bimm-bimm vunn ehre Fahrradklingel gekennt.

Ehr Nei- unn Jung-Flomerschummer kennt dess heitzudaag nimmi heere, denn 1. weed viel, viel wennischer Schischt geschafft unn 2. faschd alle „Pendler“ sinn jetzt mid emm Audo unnerwegs. Awwer ehr kennt mer's glaawe, noch heit heer isch im Schloof dess Hunnerdfache: "Alla dann, enn Guude ...bimm-bimm-bimm".

Schmidbauer (hier bekannt als Bosch)

## Bloß guude Hoodschläg


Wann sisch die Flomerschummer Baure frieher middem Fuhrwerk getroffe hänn, do war ehrn Gruß „Jow!“ Do hots noch rischdische Baure gewwe, heit sinns jo norr noch Drakdor-Gautschos. Domols sinn aach noch e paar Wörder gewechseld worre. Sällemols war do so ä gewissie Rangordnung. De klänschde Bauer hott ää Kiehle ghatt. Dess hotter gemolke unn aach middem gschaftt. Der, wu ä bissel reischer war, der hott zwää Kieh ghatt, unn demm wus noch besser gange iss, der hott en Ochs ghatt. Die nägscht Schdeicherung war en Gaul unn de reischde Bauer, der hott zwää Geil ghatt.

Es war Friejhohr, de Hase Oskar unn sei Anna hänn im Owerfeld drowwe ehr Äggerle gezaggerd. Sie wollden Grumbeere noimache. Grad hänn se die erschd Fursch gezaggerd ghatt, fahrt de Sailer Auguscht mid soine zwää Fix vorbei unn schunn kummts: "Jow, Oskar, zaggerschd? Wass machschden noi?" - "Grumbeere!" - "Aach Gott, Oskar, inn so ä klää Bläckel? Dess rendiert sisch jo gar nidd, dess iss wass fer enn große Blacke. Mach doch Gääleriewe noi, dess iss doch wass anneres!" - "Joo", hott de Oskar gsaat. "Isch kennt aa Gääleriewe noimache" - unn hott mit seim Kiehle widder gezaggerd. Grad, wie err ämol ruff unn nunner mit seim Kiehle gezaggerd ghatt hott, fahrt de Lutze Fritz mit soim Plugs-kärschel vorbei, hebt die Hand hoch unn ruft: "Jow, Oskar, zaggerschd? Wass machschden noi?" - "Gääleriewe" hott de Oskar gsaat. Do hott de Fritz soine Dicke oghalde unn sescht: "Gääleriewe machscht noi? Ja, die fressen jo nett ämool die Sei. Mach doch Tomade noi. Dess iss doch was Onneres. Do brauschschts bloß ä paar Schdeckelscher, dess iss die Welt aanet" - "S'iss aa wohr", hott de Oskar gsaat, hott mit de Beitsch gschnalzt unn mit seim Kiehle widder die Forsch nunner gezaggerd. Ess hottem awwer schunn gschdunke. De ääht sescht Gääleriewe, de anner Tomade. Wie err so vor sisch hie bebbert, werder uffgschreckt vunn: "Jow, Oskar zaggerschd? Wass machschden noi?" Es war de Koche Gross mit soim Gaul "Tomade"! De Koche Gross hott soine Gaul oghalde unn zum Oskar gsaat: "Schbinnscht du, wer machten heit Tomade naus? Die kummen doch all vunn Idalje drunne, mach doch Peederle noi, do griegschts ferr soo enn Bischel ää Mark."


Dess hottem Oskar unn de Anna nadierlich de Rescht gewwe. Sie henn ehr Kiehle rummgezerrt unn nix wie fort, de Acker nunner. Sie henn alle zwee enn Roches ghatt, warn grie unn gääl im Gsischt. Wie se dann widder gesche de Weg zaggern, hott de Oskar soi Kapp unn die Anna ehr Koppduch iwwer die Ohre gezoche, dass se nix mee heern unn nix mee seen.

Awwer s'hott nix genitzt. De Brenner Emil iss mit soine zwää Geil, unn de Gobber middem Rad vorbeikumme unn rufen vunn weitem schunn: "Jow Oskar, zaggerschd? Wass machscht noi"? Do iss emm Oskar die Sisicherung

durchgebrennt unn er kreischt: "ARSCHLESCHER" - die gehen vunn selwer uff unn merr braucht se nit zu dinge"  
vumm Franze Dietmar



## Rädseluffleesung



Rauszufinne war der Satz:

NEUER STROMVERTEILER  
AUF DEM KERWEPLATZ

**GRADDULAZION an:**

1. Mathias Wagenhoff - e floddie Kaffeemaschien \*\*\*
2. Dr. Bodo Schmidbauer - zwää blaue Froddeehanddischer \*\*\*
3. Erwin Hiller - zwää Flasche Elwedritschewoi

\*\*\* Breise vumm EDEKA-Scholz-Flomerschumm (dankschäh !)

**OISENDESCHLUSS FERR DES RÄDSEL NR. 17:**

**31. DEZEMBER 2007**

**LEESUNGE BIDDE ABGEWWE BEI  
KERAMIK-RUPP - FREINSHEIMER STR. 107**

Gegrisch	enn ganz große Voggel	Korz: Schweede	korz: Celsius	korz: Ungarn	Glicks... Fahr... Wagge...	enn griech. Gott	alsfort
▶	▼	▼	◀ 8	◀ 9	◀ 6	▼	▼
Gauner - Daagedieb	11	Gradersee	enn korze Punkt	nit reisch	▶	23	4
▶	10	12	▼	e große Kärsh	▶		18
	Theader-dääl	▶			korz: Selen	▶	
	Extraferz						
Deiwel	▶					Mussig-gebühr	
englisch: odder	3		Schweer-medall	e korzes Unner-gschöß	17	▼	Hornessel
Männer-name		Alfabeth: 23/9/21	21	englisch: nei	▶		▼
▶		▼			Kiddsche Knascht	19	13
hartes Wasser	▶			kummt aus de Leidung	▶		
Zugger-lieferant	14		24	20		korz: Podds-damm	▶
unsern Schbort-veroin		H a l t			1		
▶		▼	Babbegei mit lan-gem Schwanz	enn Vorfahr	▶		
Schdogg-werg	▶			15	5	RUPP FG/17	
Auto-zeiche: Norden	▶			Normal Null	▶		korz: Liselotte
läng-lisches Gemies	7			16		22	▼
e Mussig-noot	▶	korz: elegdrisch	uldra-violedd				
druggenes Gras	▶	▼		korz: Irland	▶		2
de Presley	▶					ABC-Nr. 15	▶

1	2	3	4	5	6	7	8	9	10	11	12	13	14
		15	16	17	18	19	20	21	22	23	24		

Liewe Leser unn Freunde  
vumm Flomerschummer Gebabbelheft,  
**die AGF bedankt sich herzlich ferr die Schbende,**

die nooch dem letschde Heft bei uns oigange sinn.

Naddierlich iss die AGF weiterhie dankbar ferr jedie Unnerschditzung  
- ferr' s Gebabbel-Heft unn ah ferr alle annre zukinfdische Brojegte.

Unser Schbende-Oinehmereie sinn:

**AGF: Sparkasse Rhein-Haardt**  
**BLZ: 54651240 - Konto Nr. 240030106**

Rainer Hannemann, Leiniger Str. 12, Eppstein  
Christl + Rolf Müller, Händelstr. 3, Eppstein  
Ursula Lutz, Freinsheimer Str. 104, Flomersheim  
Michael Gaida, An den Pflanzgärten 13, Flomersheim  
Helge + Walter Rupp, Freinsheimer Str. 107, Flomersheim

An die Adresse kann sisch ah wende, wer die umfangreich

**Chronik vunn de AGF** als

**48-seidische Schwarzweiß-Broschüre ferr 5 €** oder als

**Farbausdruck mit em Haufe Bilder ferr 30 €** oder die

**CD mit demm gleiche Text unn alle Bilder ferr 10 €** oder dess

**Flomerschummer -Gebabbel-Heft** oder die gelb/griene

**Flomerschummer Babbierfähnscher - 10 St. ferr 2,50 €** oder enn

**Flomerschummer Anschdeckpinn ferr 2,50 €**

**oder e gelb-grienes Ortsbanner 2x1 m ferr 65 €**

kaafe oder beschdelle will.

**Imbressum:**

Idee/Gscheidung/Illusdrazion/Rädsel: Walter Rupp

Redagzion: AGF-Arweitskreis "Flomerschummer Gebabbel"

Druck: Fa. Erdelmeier - Medienagentur. Druck. Verlag - Worms

Druksfehler sinn beabsichdischt unn exdra zur Unnerhaldung  
oigebaut. Wer ähner findt, der derfen behalde.

Beidrääg ferr Nr. 18 bidde abgewwe bei Rupp, Fränsemer Str. 107

Flomerschumm im November 2007